

Importando Skuridat

Den último añanan, un selebrashon deskonosí, poko poko ta infiltrá drenta nos komunidad. Sin duda un motibu pa esaki ta nos lasonan komersial i turistiko ku Merka. Maske nos tin poko idea kiko Halloween ta, negoshinan ta dòrná ku plachi di pampuna grandi oraño ku kara mahós kòrtá den su banda, hende di bruha (“heks”), karpachi, skeleta, pushi pretu, èts.

Mas ku 2000 aña pasá, e sèltanan a biba na e region konosí awendia komo Gran Britania, Irlandia, i parti nort di Fransia. Segun nan kalènder, aña nobo a kuminsá dia 1 di novèmber, temporada di aña ku frieldat i skuridat ta oumentá. E nochi promé, tabatin un fiesta pa onra Samhain, e dios sèltiko di morto. E sèltanan a kere ku Samhain a pèrmití spiritu di defuntonan bolbe na nan kas bispu di aña, esta 31 òktober. Pa evitá bishita di spiritunan, hende a desfrásá òf laga kuminda pa spiritunan no destruí nan kas òf kosecha

E anochi ei, tur hende a paga kandela den kas. Saserdotenan sèltiko, konosí komo druídanan, a traha un kandela grandi i a sakrifiká bestianan, kosecha, òf asta hende bibu. Dor di opservá kon nan a muri, e druídanan a pronostiká nan fortuna pa e próksimo aña. Kada famia a bolbe sende kandela den nan kas for di e kandela aki.

E romanonan a konkistá e sèltanan 43 aña despues di Kristo. *Feralia*, e fiesta romano pa onra defuntonan na fin di òktober tabata kombiná ku fiesta di Samhain.

Ora e sèltanan a kombertí na katolisismo, nan a keda ku hopi di nan kustumbernan pagano. Durante síglo 9, Iglesia Katóliko Romano a kambia dia di tur santu for di 13 mei pa 1 novèmber pa hende por sigui ku un fiesta ku nan a selebrá promé ku nan a bira katóliko. E misa di e dia ei tabata yamá *Allhallowmas*. E nochi promé tabata konosí komo *All Hallow e'en*, òf *Halloween*.

Ku esaki na bista, nos tin ku hasi nos mes e pregunta si Halloween di bèrdat ta algu sano ku nos ke introdusí na nos islanan. Nos tin ku konsiderá vários punto.

1) Halloween su lasonan ku bruheria den pasado i presente ta indeskrutibel. Awendia bruheranan ta selebrá kuater sabat durante aña. Esun prinsipal ta dia di Halloween. Bruheria ta algu ku nos ke promové? Talbes e desfras i plachinan di bruheranan ta parse inosente. Ma nos ke enkurashá nos yunan pa mira obranan di skuridat komo algu inosente?

2) Dios ta papia fuerte kontra bruheria. “...e persona ku bira bai tras di montadó i spiritista...lo Mi pone Mi kara kontra e persona ei... Entre boso no mag wòrdu hañá ningun hende ku ta...praktiká bruheria, òf ku ta pronostiká, òf ku ta praktiká magia, ni ningun hende ku ta plega hende, òf ku ta montadó òf spiritista, òf ku ta konsultá ku mortonan... No pèrmití pa un hasidó di bruha keda na bida.. (Levítico 20:6; Deuteronomio 18:10-11; Eksodo 22:18). Si Beibel ta kondená bruheria tan fuerte, ta korekto pa trata un dia asina komo algu inosente?

3) Tantu otro kos malisioso ta sosodé na Halloween: manera kandelanan sendí intenshonalmente, vandalismo, destrukshon di propiedat, violensia, blet òf feneta den mangel i fruta, ritonan seksual, èts. Esei ta kos ku nos ke importá di afó?

4) Halloween no ta parti di nos kultura. Pakiko import'é na nos islanan? Sigur un motibu ta turismo. Ma djis pasobra turistanan ta selebrá Halloween—i pasobra nos ta deseoso pa aliviá nan di un tiki di e sèn ku nan ta trese—nos ta despuesto pa ignorá nos balornan? Kiko ta mas presioso: e sèn ku turistanan ta trese òf nos normanan i balornan?

Nos por kere ku Halloween ta un dia “leuk” pa muchanan. Ma komprendiendo origen di e selebrashon i kiko ainda ta aososiá kun'é, nos ta realisá ku no ta “leukheid” so ku nos ta importá, ma tambe tur e skuridat diabólico di Halloween.